

JON RI PEPTAIJ; JISŌS EJ PEPTAIJ

Kōttōpar ko an katak in:

- Kwaļok kōn jermal eo an Jon ri peptaij.
- Kwaļok kōn meļeļein “ukeļok.”
- Kwaļok bwe Jisōs ej Anij.
- Kwaļok unin an Jisōs peptaij.

Meļeļe ko reļap ilo katak in:

- Jen lo bwe aolep armej rej aikuj in ukeļok.
- Jen lo bwe ukeļok ej ñe jej oktak ñan Anij kōn an oktak ļōmņak ko ad.
- Jen lo bwe ad jermal ñan Anij e ban ļomņoren kōj.
- Jen lo bwe Jisōs ear pokake aolep iien, im E wōt E maroñ in ļomņoren kōj.

Emōj ad katak kōn ļotak eo an Jisōs. Ilo iien an ļotak tōujin enjeļ ro raar waļok ilo mejatoto ñan kwaļok bwe Jisōs ear itok jān lañ. Elōñ ri kanpil ro raar itok im kabuñ ñan E ñan kwaļok bwe E Anij. Ear ļotak ilo juon jikin ettā, juon baamle ettā, im juon jikinkwelok ettā. Armej ro rettā tata, seperd ro, raar loļok e mōktata. Men kein rej kwaļok bwe Jisōs, meñe E Anij, ear make kajeramol e im erom juon armej ettā bwe En mej kōn kōj.

Ilo iien eo ke Adam im Iv raar jerowiwī, Anij ear kallimur kōn Juon eo me enaaj juur bōran Jetan. Jisōs ej ineen kōrā eo me Anij ear kōnono kake ilo Jenesis 3:15. Anij ear kōņaan kapojak armej ro ñan itok eo an Jisōs Kraist. Kōn men in ear jilkinļok juon ri kōjjeļā iņaan.

1. Jon Peptaij ear kōpooje iaļ eo an Jisōs.



Matu 3:1 Ilo raan ko Jon, ri peptaij, ear itok, im kwaļok ilo āne jemaden in Judia.

Ewi wāween an kar Jon kōpooje armej ro ñan itok eo an Jisōs? Ear kareel armej ro kōn elōñ naan ko re jouj im reņman ke? Ear ba bwe Ri Kapit in enaaj kōmņan elōñ men in kabwilōñļōñ ko im jipañ armej ilo elōñ wāween ke? Ear ba bwe Enaaj bōk tok jeraamņan im mōņōņō ke? Ejab. Jon ear kwaļok juon wōt wāween kapoje iaļ eo an Jeova. Armej otemjej ren ukeļok!

2. Jej aikuj ukeļok eļañne je kōņaan bōk Irooj āinwōt ad Ri Lomņor.



Matu 3:2 “Komwin ukeļok ippemi bwe aelōñ in lañ epaak.”

Ilo raan kein elōñ kabuñ rej kajjioñ in kareel armej, ak ilo bar juon wāween ba, eņōde armej. Ñe armej rej ļōmņak kōn aer ukeļok ilo juon kabuñ, jet iien rej ļōmņak wōt kōn jeraamņan ko im renaaj bōki ie. Jet rej ba, “Inaaj kabuñ ijo kōnke re kōņaan beat ilo iien Kūrijmōj.” Elōñ rej tōmak bwe kabuñ eo aer enaaj jilkinļok ro nejāer ñan America bwe ren jikuuļ. Elōñ jet rej ukeļok kōnke emņan makūtūt ko im program ko ilo juon kabuñ. Mool ke bwe Jon ri peptaij ear kareel armej kōn men rot kein? Ekar jab. Naan eo im ear kwaļoke ear juon naan in kaamijak im kakkōl. Ukeļok! Ko jān ekajet!

3. Ta mejele in naan in ukeļok?

Mokta, jen lōmņak kōn jet wāween ukeļok ko re bōd. Ejab ukeļok

- ñe kwōj wanmaanļok ilo iien jar im koba ippān juon kabuñ
- ñe kwōj jutak iṃaan ri jar ro im kallimur bwe jān kiiō im etal kwōnaaj tiljek
- ñe juon ri kaki ej jare im kaukeļok eok
- ñe kwōj kallimur bwe kwō naaj oktak im jermal ñan Anij.

Innām ta mejele in men in ukeļok? Lukkuun mejele in naan in ukeļok ej oktak. Elōñ ruo kain oktak rej waļok ilo iien ad ukeļok. Jej oktak jān jet men im jej oktak ñan bar jet men.

4. Ta eo im jen oktak jān e?

1. Jān lōmņak ko re bōd kōn Anij.

Jen kile bwe elōñ juon wōt Anij e mool im jen karijer wōt ñan E. Kab jen kile bwe, kōn An kar kōmānman kōj, ewor An maroñ in jiroñ kōj kōn aolep men, im jej aikuj pokake E. Jen kile bwe E kwōjarjar, im Enaaj kajeik aolep nana. E ban kōtļok ro im ewor rueir.



Matu 4:10 Kwōn kabuñ ñan Irooj aṃ Anij im kwōn jermal wōt ñan E.

Eļañne kwō jab kōṃaan kōttāik eok ñan Anij im naan ko An innām e riab aṃ ukeļok.

Juon bar lōmņak e bōd kōn Anij ej bwe E ban liaakļok ñan hell aolep ro rej jerōwiwi. Bōtab Bible ej ba bwe Ej jiroñ kōj bwe jen pokake E aolep iien. Ewor ke juon armej im ear kōjparok aolep kien ko joñoul? Ejjelok.

Eļañne juon armej ear kōkkure juon wōt iaan kien ko, im ear riab juon wōt katen ilo mour eo an, men in enaaj juon jerōwiwi ke? Aet, im aolep jerōwiwi ej kōjepel kōj jān Anij. Aiseia 59:2



Jemes 2:10 Bwe jabdewōt eo enaaj kōjparok kien otemjej, a ej buñ ilo juon iaer, ewor ruōn kōn aolepeir.

Anij ej dike jerōwiwi. Jaar pepe in jab pokake E. Kōn men in jej aikuj in mej indeeo (Rom 6:23).

2. Jān lōmņak ko re bōd kōn kōj. En oktak ad lōmņak kōn kōj make.

Elōñ iien, jej lōmņak bwe ewor jet men me je maroñ kōmṃane ñan kabuñ būruon Anij. Jen kile bwe ejjelok ad maroñ in kabuñ būruon Anij kōnke kōj ri jerōwiwi. Eṃōj ad jerōwiwi ñae Anij im ekkar bwe jen eñtaan ñan indeeo. Kwō jeļā ta? Joñan ad nana meñe jej oktak im kajjioñ jermal ñan Anij bwe jen mour indeeo ilañ ippān, e ban tōprak.



Aiseia 64:6 Bwe kōm otemjej kōmij āinwōt juon eo ettoon, im men in wānōk ko am rej āinwōt juon nuknuk e bwidejdej; im kōm otemjej kōmij aemedļok āinwōt juon bōlōk; im jerōwiwi ko am, āinwōt kōto, rej bōkļok kōm.

Ilo Matu 3:6 ke armej ro raar peptaij ippān Jon, raar kwaļok jerōwiwi ko aer. Ke Piter ear ukeļok, ear ba ñan Jisōs, *Kwōn ilok jān ña bwe ij juon armej e nana.* Ke Ri tōl owōj ear ukeļok ear ba, *Kwōn*

tūriamo kake eō, juon ri jerowiwī! Eļāñņe je jab būromōj kōn aolep jerowiwī ko im eņōj ad kōmmani innām ejab mool ad ukeļok. Eļāñņe ejab oktak ad lōmņak kōn ad make maroņ im ad jermal ñan Anij, innām e riab ad ukeļok.

5. Ta eo im jen oktak ñan e?



Luk 14:27 Im jabdewōt eo e jab bōk an debwāāl, im ļoor Eō, e ban rū kaļora.

Ñe e jejjēt aņ ukeļok innām kwō naaj oktak ñan Jisōs. Elōņ re lukkuun kōņaan oktak jān aer jerowiwī im jermal ñan Anij, bōtab re jab oktak ñan Jisōs Kraist im E wōt ñan kawānōk im lōmoņren er. Ijellokun, rej oktak ñan juon kabuņ ak juon mour in jermal ko remman.

Ke jej pād ilo ad jerowiwī, jej ļoor kōņaan ko ad make, bwe eņōj ad joļok Anij jān An Irooj ilo mour ko ad. Ñe jej ukeļok, jej iloķ jān ad ļoor kōj make ñan ad kōttāik kōj ñan Jisōs bwe En ad Irooj.

Juon iien ri jelōk Paul ear iioon jet lōmaro im eņōj aer ukeļok ippān Jon ri peptaij. Meņe raar būromōj kōn bōd ko ad raar jaņin lōke Jisōs im bōk Jetōb Kwōjarjar. Paul ear kōmmeļeļeik er kōn Jisōs.



Jermal 19:4 Innām Paul e ba, “Jon ear peptaij kōn peptaij in ukeļok, im ba ñan armej, bwe ren lōke Eo enaaj itok ālikin, E in Jisōs.”

Elōņ armej re jelā bwe ren oktak, bōtab re oktak ñan juon men e nana ļok. Ñe kwōj pād wōt ilo jerowiwī ko aņ, kwō naaj mej im etal ñan hell. Bōtab eļāñņe e bōd kilen aņ ukeļok innām kwōj pād ilo juon jikin e nana ļok kōņke kwōj lōmņak bwe kwe juon Kūrjin ak ilo mool kwōj pād wōt ilo nana koņ aņ. Eņin un eo bwe Jisōs make ear ba men in ilo Matu 23:15 *Wo ñan koņ skraib im Parisi ro ri jelā moņ! Bwe koņij kōpool lōmeto im āne bwe koņwin kaltok juon ri kaļorami, im ñe e po, koņij kōmman e bwe en ruo alen nejīn Geena jān koņ.*

En jab bōd kilen aņ ukeļok. Kōj aolep ri jerowiwī. Jisōs wōt e maroņ lōmoņren kōj. Eļāñņe je kōņaan mour indeeo je naaj aikuj oktak jān jerowiwī ko ad im oktak ñan Jisōs. Ej meļeļe in bwe jen lōke E im E wōt ñan kawānōk kōj im lōmoņren kōj ñan indeeo.



Rom 3:25,26 Eo Anij ear kwaļok E bwe En kein medek, kōn tōmak ilo bōtōktōkin, bwe En bakajjien An wānōk kōn an kijoone jerowiwī ko ļok, ilo meanwōd an Anij. Aet, bwe En bakajjien An wānōk ilo iien in, bwe En wānōk, im Ri kowānōk eo ej lōke Jisōs.

6. Jon ri Peptaij ear peptaije Jisōs.



Matu 3:13 Iien eo Jisōs ej itok jān Galili ñan Jordan, ñan ippān Jon, bwe en peptaij E.

Etke armej ro raar peptaij ippān Jon? Kōņke raar kwaļok aer jerowiwī im raar kapojak ñan itok eo an Messaia eo, Jisōs Kraist.

Naan in “peptaij” ej itok jān juon naan ilo kajin Grik, *baptizo*. Juon wāween in aer kar kajerbal naan in ej ke raar colorki nuknuk. Raar bōk juon nuknuk im katuloķe ilo dān me e color bwe aolepen nuknuk eo en bōk color eo.

Peptaij e jab karreo armej jān jerowiwī. Bōtōktōken Jisōs wōt e maroñ kōmman men in. Peptaij ej juon kakōlle bwe emōj ad koba ippān Kraist. Emōj ad ilok jān jerowiwī ko ad, im jej rū kaḷoran Jisōs kiiō.

Jon ear jiroñ armej bwe ren ukeḷok jān nana ko aer.



Mt 3:1,2 Ilo raan ko Jon, ri peptaij, ear itok im kwaḷok ilo āne jemaden in Judia, im ba, “Komwin ukeḷok ippemi, bwe aelōñ in lañ epaak.”

Ri utiej ro an kabuñ raar jet iaan ro raar itok im roñ naan ko an Jon.



Mt 3:7 A ke ej lo elōñ Parisi im Saddusi rej itok ñan an peptaij, e ba ñan er, “O bwijin vaiper ko, wōn ear kauwe kom bwe komwin ko jān illu e naaj itok?”

Juon vaiper ej juon jedpānit paijin. Etke Jon ear ba bwe armej rein raar nana im āinwōt viaper ko? Kōnke meñe raar ri kabuñ, e bōd aer meḷeḷe kōn men ko an Anij, im e bōd aer katakin armej. Raar katakin armej bwe Anij enaaj bōk er eḷaññe rej loor iminene ko an kabuñ im eḷaññe emman aer jermal ñan Anij. Jen lale jet iaan ro im Jon ear kōnono ñan er:

Parisi ro:

Parisi ro raar ri tōl ro an kabuñ eo an ri Ju. Eḷap aer kajjioñ in kōjparok kien ko an Anij. Raar katak Kallimur Mokta eo, im raar jar aolep Jabōt, leḷok juon mōttan joñoul, jitḷok, im kajjioñ in kōjparok kien ko. Bōtab, raar jab ḷōmḡak bwe raar ri jerowiwī me raar aikuj juon Ri Lomōḡor kōnke emman aer jermal ñan Anij. Raar kobaik jet kien ñan Naan in Anij im jiroñ armej bwe ren pokake men kein.

Saddusi ro:

Armej rein raar barāinwōt ri tōl, im raar kabuñ ilo tempel eo aolep iien. Bōtab raar jab tōmak bwe ewor jerkakpeje ak enjeḷ ak jetōb. E aorōk ippaer bwe ren jermal ippān ro ri Rom im bwe en wanmaañḷok aelōñ eo aer. Raar ḷōmḡak bwe Anij e mōḡōḡō ippaer kōn aer kabuñ im jermal ñan E.

Skraib ro:

Ilo kar tōr eo, Jeje ko ilo Kallimur Mokta raar pād ioon scroll ko (book ko re lemlem ilo doulul). Jermal an Skraib ej ñan copy book kein. E aorōk jermal ko aer, im kōn aer copy im katak Jeje ko, raar ḷōmḡak bwe emman aer mour. Ear utiej būruier, im raar ḷōmḡak bwe Anij enaaj bōk er kōn aer jeḷā kobban Jeje ko im jermal ñan E.

Aolepeir raar aikuj in ukeḷok jān aer ḷōmḡak bwe e bwe an emman aer mour. Raar aikuj oktak im kile bwe ejjeḷok emman ilo er im jermal an Jisōs wōt e maroñ lomōḡoren er. E pen an armej kōttāik er im ba bwe e ban bwe jermal ko aer im bwe er ri nana. Bōtab aolep armej rej aikuj kōmman men in - men eo me jej ba, “ukeḷok.”

Jisōs ear juon ri jerowiwī ke? Jaab. Innām etke Ear peptaij? Jon make ear bōbrae e im ba, *Emman kwōn peptaij eō, im Kwōj itok ñan ippa ke? Matu 3:14. Ekwe uwaak eo ej pād ilo Matu 3:15 ...Kwōn jab bōbrae Eō kiiō; bwe ekkar āindein ad ro kaḡool emman otemjej.*

Ewi “emman otemjej” ilo eoon in? Jon ear juon ri kanaan an Anij. Anij ear jiroñ Jon bwe en peptaije armej. Ełaññe Jisōs ear jab peptaij innām E ban kar pokake Anij Jemān ilo aolep men. Enaaj kar barāinwōt kawaane jermal eo an Jon ri peptaij.

Baibōl ej jiroñ kōj bwe Jisōs ej Anij. Ear erom juon armej bwe En erom juon men in katok kōn kōj. Āinwōt juon armej, Ear kōjparok aolep kien ko an Anij toun wōt An mour ioon lał in. Jisōs ear ba men in:



Jon 8:29 ...iien otemjej Ij kōmman men ko rej kabuñ būruon.

Wōn iad e maroñ ba men in? Wōn iad e maroñ kabuñ būruon Anij iien otemjej? Ejjełok! Kōn men in ejjełok enaaj wānōk kōn jermal ko an make. Jisōs ear peptaij kōnke ear kabuñ būruon Jemān ilo aolep men. Bōtab armej ro ipelaakin Jisōs im Jon raar jab jełā men in. Bōlen raar ļomnak bwe Jisōs Ear ukełok im kwałok jerōwiwi ko An āinwōt armej ro jet kōnke Ear peptaij āinwōt armej ro jet. Anij ear jab kōnaan bwe en bōd an armej ļomnak kōn Jisōs Kraist nejin. Kōn men in Ear kajermal ruo ri kōnnaan ñan kaṃool bwe Jisōs ej Ri Lomōor eo: E make im Jon ri peptaij.

7. Anij ear ba ta kōn Jisōs ilo iien An peptaij?



Matu 3:16,17 Im ke emōj an Jisōs peptaij, e mōkaj An ato jān dān; im lo, e mejał ļok lañ ñan E, im Ej lo Jetōb an Anij ej kālaltak āinwōt ṃule, im jok ioon; im lo, ainikien jān lañ ej ba, “E in Neju jītōnbōro ippa, Ij mōñōñō kake.”

Ke Anij ear ba “Ij mōñōñō kōn E” ej melelein bwe Jisōs ear kabuñ būruon Jemān aolep iien. Ear erre otem erre. Ear jab jerōwiwi ñan jidik. Barāinwōt, ke Anij ear ba “E in Nejin Jitōnbōro Ippa” ear kwałok bwe Jisōs ej Anij.



Jon 5:18 Innām kōn men in ri Ju ro elapļok aer pukot bwe ren man E, bwe Ear jab kōkkure wōt raan Jabōt, a barāinwōt Ej ba Anij e Jemān, im make kōmman E āinwōt Anij.

Ełaññe Jisōs ej juon anij e edik ak men in kōmanman eo elap tata an Anij, innām Ear jab maroñ in kōmman aolep men ko me Jemān ej kōmmane. An Anij Jemad ba bwe Jisōs ej Nejin Jitōnbōro Ippān ej kwałok bwe Jisōs ej Anij.




I Jon 5:20 Im je jełā bwe Nejin Anij ear itok, im Ear letok ñan kōj mālōtlōt bwe jen jełā Eo e ṃool, im kōj ilo Eo e ṃool, ilo Nejin, Jisōs Kraist. E in Anij e ṃool im mour indeo.

Jej barāinwōt lo bwe jilu rej wałok ilo iien in. Ainikien jān lañ - Anij Jemān. Jisōs - Anij Nejin, im Jetōb ilo annañin juon ṃule - Anij Jetōb. Rein jilu rej juon wōt Anij.

8. Jon ri Peptaij ear ba ta kōn Jisōs ilo iien an peptaij?



Jon 1:29 Raan eo ilju Jon ej lo Jisōs itok ñan ippān im ba, “Lo, Lamb an Anij, Eo ej bōkļok an lał jerōwiwi!”



Ilo Kallimur Mokta jej lo elōñ katak ko kōn bōtōktōk, kōn lamb ko, im kōn an ri Ju ro katok ñan Anij. Anij ear pinej keelwaan an Adam im Iv kōn juon kidu emōj man e. Abel ear katok kōn juon sheep. Juon lamb ear bōk jikin Isaak ke Ebrean ear iten man e. Ri Ju raar likūt bōtōktōken juon lamb me ejjelok notaan ioon kōjām ko aer bwe ren jab mej. Ilo aolepen Kallimur Mokta raar katok kōn sheep. Kein ta men kein? Kein kapojak armej ro ñan itok eo an Jisōs Kraist.

Jisōs ej Lamb eo Eļap an Anij. Ear make katōrlok bōtōktōken bwe en karuwaaklok kōj ñan Anij.



Hibru 10:11-14 Im pris otemjej rej jutak raan otemjej im jermal ilo katok makij kōn men in katok ko wāween wōt juon, ko re ban jeorlok jerowiw; [12] A E, ke emōj An katok kōn juon men in katok kōn jerowiw ko indeeo, Ear jijet i anmoonōn Anij, [13] Im jān iien in Ej kattar iien kōmman ro ri kōjdate eran neen. [14] Bwe kōn juon men in katok Ear koweppān indeeo ro im Ej kokwōjarjar er.

Kōj ri ban. Jej aikuje juon Ri Lomoor. Jon ear lamōj im ba ta ke ej lo Jisōs? Lo, Lamb an Anij. Im ewi jermal eo im ear itok kake? Ear itok bwe En bōklok an laļ jerowiw. Ewi wāween an juon lamb bōklok an laļ jerowiw? Kōn An make lelok e juon men in katok kōn kōj. Kōj ri ban! Ejjelok juon men je maroñ kōmmane bwe jen wānōk imaan mejān Anij. Ilo Jisōs Kraist maroñ eo an Anij im ban eo an armej rej wōnmae doon. Rej idik peen doon.



Rom 5:6 Bwe ke jaar mōjño, ilo iien ekkar, Kraist ear mej kōn ro ri nana.

Eoon in ej kwaļok ruo men kōn kwe im ña. Kōj ri mōjño im kōj ri nana. Ekkar bwe jen jako indeeo kōnke kōj ri nana. Im ejjelok men je maroñ kōmmane ñan ukōt men in kōnke kōj ri mōjño. Eñin un eo bwe jej aikuje juon Ri Lomoor. Jermal ko ad re ban jipañ kōj ñan jidik ilo ad jibadek lok aelōñ an Anij. Kwōn reiļok ñan Lamb eo an Anij, me ej bōklok an laļ jerowiw.

Kajjitōk ko

1. Wōn ear kapojak armej ñan itok eo an Jisōs?
2. Ewi wāween an kar Jon ri peptaij kapojak armej ñan itok eo an Jisōs?
3. Ta lukkuun meļeļe in naan in ukeļok?
4. En ewi wāween an oktak aō lōmņak kōn Anij?
5. En ewi wāween an oktak aō lōmņak kōn ña make?
6. Ilo iien ad ukeļok jen oktak ñan wōn?
7. Mool ke āinwōt juon ñe e bōd kilen aņ ukeļok?
8. Armej ro raar kwaļok ta ilo iien aer peptaij?
9. Etke Jon ri peptaij ear kajjioñ in kabōjrak Jisōs jān An peptaij?
10. Innām etke Jisōs ear peptaij?
11. Wōn ear jiroñ Jon ri peptaij bwe en peptaije armej?
12. Anij ear ba ta ilo iien an Jisōs peptaij?
13. Anij ear kwaļok bwe Jisōs ej wōn?
14. Jon ri peptaij ear ba ta kōn Jisōs?